

職方典第四百六十三卷

南陽府部藝文四

開煤洞記

明張僊

予去鄧七年矣見鄧之人則喜聞鄧有善事輒欣然爲色動蓋人之不能忘深爲鄧得君慶也尙已久缺銓部難其選至秋始以卑高要潘君君宿有雋望予素知君君亦知予之渚以產蒲葦民之焉因見君意見廓而料理練爲民之念甚切深爲鄧得君慶也越二年春州貳無爲呂子以書抵予閩之則爲君開煤洞厥有底績請予記之且言鄧士民意也夫此予所欲爲而未成者今成之予方喜鄧民之永賴而多君之能造福也烏敢以不文辭予竊惟天之生民也必生之物以養之其切於人而不可一日缺者未有如菽粟水火之爲甚粵稽邃古教民稼穡制之火食其湛澤廣洽不可尙已自時厥后凡有民物之責有能輔相其所不及者雖心之所用工之所就不同要之均不爲無補於世也鄧地多沃壤四望平曠其菽粟之所出可他州比獨無山谷以繁林木洲渚以產蒲葦民之樵採無所給而資之以炊爨者惟黍稷焉耳麻稽焉耳其爲物既微苟遇旱澇則所出益寡價愈騰貴

雖中人家猶難致之而況其貧者室無升斗之積而又病舉火之難其幾何不嗷嗷轉而爲孳也先是民相傳州西百二十里洞兒山有煤產焉前州守正德間咸寧于公率工鑿之嘉靖間太原王公及予相繼取之然舉之無焰間有可者又微藏於石隙之中獲少而費多事每中輟比君至偶陰雨爲災民益沉寗產蛙公以山有寶藏既見端緒而不爲世用非坤厚之體本然也人力之未至耳乃毅主斯役徵匠於南召得善煤者數人又擇勤事之鄉耆劉有慶董之給之工直頒之犒賞越二月而罔有功君不敢少懈益嚴勅耆匠必期於獲而後已繼而二越月又猶是君皇皇如有所失日夕虔惕默禱於天而耆匠之承役者亦殫力遍搜忽於山之西三里許若有挾之以行者得煤穴一道試燃其焰灼灼然與前之煤迥異於是率吏民詣山祭告仍鑿深廣以便運輸已又於內鄉之西二十五里花墓山訪獲一洞又命鄉耆張廷翠往鑿之三月而卽告成功殆易於前山也自是民朝夕咸賴以鑿而向之黍稷麻稽減價十之三四老稚歡呼各得其養矣夫養道備則教易行教易行則風俗益美人才輩出而鄧之爲州又將益煜乎其有聲也其所裨豈小小哉藉使君之來鄧如前乎此者安其故而不爲又如予之二三守相繼爲之者苦其難而中輟則艱食之患猶如故也誰其

與瘳惟策之以必爲之志而期之以必收之效乃能成績昔鑿之而微露今通之而廓如昔一山而未獲今兩地而呈靈爲於數十年之久者獲之於一旦之迅矣此豈地之藏其出有時而君適值其會乎抑天之生人之能物之利必相濟而後能顯其用乎蓋君精誠所積感通無間金石可貫鬼神依順與古之救焚而反風拜井而得泉者先後同一昭應也其明以豫謀果以立斷勤以集事悅以動民誠以孚感一事而衆善集君誠有焉是奚可以不記因書以復於士民鑲之石俾鄧之世世有能因粒食而思稷者則亦思君於無窮也君名庭楠字士器號石洞廣東之高要人

修外城議

前人

夏四月鄧州志刻成余辱有員外郎之遷先是因外土城頻年修築費不貲里老率有衆具呈欲加磚砌余爲請於三察院及守巡二道蒙撫治陽華章公批云據申具見宏廓之識練達之猷辨證則洞悉古今經略則兼包遠邇而其間意外之慮先事之防則尤難與俗吏發語者仰州卽如議舉行乃卜吉祭告籲衆興工分方向則仍舊之各有定處計丈數則因產之新有低昂每里擇一二人以總其綱各甲則推一人以理其細力出於衆而夫匪傭財用於民而官不斂民欣然趨事期以秋後

告成而余轉官之命下矣夫用靜之與動衆非特明者知之雖夫人亦知之也但成大事者不惜小費懷永圖者不狃近功以修緝一二年之費而可以易千百年無窮之安與民同欲者當知所擇余去不能不仰賴後之嗣政君子也謹申告於末簡以適觀厥成

水利

吳承恩

嘗聞中土高阜多宜黍稷惟新野地形卑下唐白刁深諸河經行其中每遇盛夏淋雨居民沉溺黍稷暢茂適惟其時一經渰沒籽粒無收故古人創陂堰之利實小民命脈之依且江南水田仰救池塘其流易竭江東水田仰救江海其力頗勞新野之陂取有源之水操建瓴之勢誠所謂天時不能爲之菑者後來人事因循法制廢弛奸黠之民陰圖兼并報官開墾願納租銀不係歲辦徵輸原無常期有司之更代不時吏書之埋沒無跡歷至數年或不一徵及至徵收不告曰水渰則告曰未種漫無查考多至倖免視種納糧田地得倍常之利無分文之費而谿壑之欲指此爲俎豆之珍矣近年以來節奉上司明文修復如嘉靖十一年奉守道劉右叅嘉靖三十年奉趙右叅俱嘗身歷其地而目覩其成修復未幾而奸黠者卽從而破壞之方其修之之日羣千夫之力積數月之功成之而

不足及其壞之之日假匠夫之手乘終朝之隙毀之而有餘奸黠愈爲得計而小民無可奈何致令
陂下田地夏之日欲種黍稷則下無所泄不免有水溢之患秋之日欲種秔稻則上無所漑不免有
旱乾之患地方疲弊百姓困窮多原於此又或指有用之陂爲閒曠之地聯兼并之黨爲無業之民
殊不知陂堰者古人已成之蹟水田者小民衣食之資圖未獲之租而廢已成之法壞小民之產以
濟奸人之欲恐亦傷爲政之體矣但每陂之下爲夫不啻百家勤者從事惰者沮之智者舉事愚者
非之富者舉事貧者苦之互爲異同自相可否匪徒奸人壞之小民亦有壞之者矣竊考井田之法
每溝之中其爲夫者十每川之中其爲夫者萬當時莫不因時興事併力以成功蓋如遂人匠人之
中所以專掌溝洫之制稻人之官又教民以作田興水之法官以時而號召民以時而興作勢有所
統權有所歸是以上無廢政下無荒業今日之事其權在上其力在下而歲時督責實在於有司某
到任數月以來嘗親歷各陂相其地勢詢之民情中間形勢變遷水難導引如化陂厚陂周仁白家
墓營上羊等陂已經久廢便難舉行如杜長羅陂下羊栗陂王陂雖故道尙存而湮沒亦久俟某再
行相其地勢之順逆人力之難易費用之多寡逐一議處次第舉行另行開報外如新陂曲尺瓦亭

三處故堤舊道俱各現存但新陂曲尺陂未曾被人耕種已經差官給帖一面修理其瓦亭陂係三十四年告申耕種上納租銀今無禁止仍令封堤蓄水以備灌溉深爲便益

南陽風俗論

李登

自余問俗三年於茲矣咸爲余言國初俗尚信如舊志云云第邇來則不然阡陌之民不爲終歲計少稔卽家置酒相競一歛便窘迫或妻孥不相畜閭閻間更習淫奢崇勢利蔑長少之節今昔比睇霄壤矣乃以余觀其間學士大夫家喪祭用朱文公儀節婚且備六儀非不近古可漸摩禮教然往往童而冠同姓者常爲婚士居親喪時時易服行慶賀謁官長以爲敬甚至有暖喪之說初喪輒鼓吹數日其弔祭者每以多邀親知醴金備儀爲勝彼此互拉常十數往而不能却其煩而喪者亦營營款讌間日無暇嗚呼陋甚矣陋甚矣果無良有司之表正耶抑學士大夫未有以倡率之耶欲挽弊習而復之古道均之不容解其責也已

南陽版籍說

前人

我國家累世熙平民其間生聚蕃孳民數較初年殆三數倍推之他可知已顧民宗派漸遠室廬

既遷往往不便於共由余始至適丁編審則奉部檄許人分戶自便一邑懽聲如雷然軍匠有勾斷難別籍而地產多者常愈充重役若收頭若解戶無容避也於是覈其族廬俱遠者仍其舊戶之總而爲之分門親供審冊藏諸庫云

南陽置郵

前人

驛遞之善惟均主賓之情見賓客之當奉者驅吾民之力以爲悅見民力之當恤者使行旅邇邇而不得前且有他虞焉是二者皆過也昔春秋時各國其國民其民然往往載待賓之訓尙相傳以爲善物矧今宇內一家時耶使主人曰此方之客朝廷之臣子也供應不可不備而客亦曰此方之民朝廷之赤子也患苦不可不恤豈不庶幾乎盛世之事哉夫客不可必也在主者之旣乃心耳

南陽后妃

前人

妃匹之際生民之始以余觀於陰鄧一姓而有二后一難二姓各有二后二難四后同出一鄉三難且多賢淑流光帝籍四難蓋新野八水匯流堪輿家所謂水纏元武而邑居其中爲得河洲之勝坤德之鍾豈偶然耶然河精間氣悠久無疆古之帝鄉今爲王府新野王妃則邑劉濡之女西陽王妃

則邑龐璣之女輔國將軍夫人則邑劉棟之女鎮國將軍夫人則邑鄭富之女也前輝後映陰鄧之遺風殆千載而未艾矣

重修迎仙橋記

前人

邑城北九里許有橋曰迎仙取名之義無所考證因之固無妨已爲橋廣丈許長倍之小橋也胡爲乎記之橋當邑路之中而邑又當天下南北之中賓旅輻擊往來無虛日子初至邑則傾圯久矣行者告病橋梁道路有司事也而衝繁之邑無所營費日爲之感然於是有民宋真者素好義樂施予多所營建屬之募邑中之樂施予者若干家而真自捐石灰七十餘石召近鄉之夫畀石架木甃砌築構始自隆慶六年之秋迄萬曆改元春而橋落成橋成一邑之經行者稱便南北之賓旅輻擊者悉稱便橋則小所濟則大矣自此記之作予豈徒然哉夫公天下之利者義也義在人心其所同有茲捐力捐財之民多寡雖殊豈必皆福田利益茫昧之是圖抑亦好義之心未泯誠使人人好義之心未泯則彼此相濟其爲福田利益也顧不彰明較著耶予故識吾民之義舉并勒施者之名於碑陰亦以爲勸也則予記之作又豈徒然哉初橋成予命邑人爲記往往歸功於令非令本意也於

是乎書

重修南召城記

方九功

南召在郡城北百二十里其地故屬南陽縣國初置鴉路巡檢司以鎮之成化十三年撫按議析南陽縣北壤置南召縣是年築城者張侯琪也城圍三里有奇高二丈廣一丈池之深廣稱是建城門三東曰東興南曰博望西曰永豐時屬草創制尙簡陋至嘉靖甲午馮侯蛟動衆修理易東門曰通汴南曰近宛西曰連嵩各增建戍樓其上規模視舊稍備然未固也後水患相仍傾圯過半隆慶戊辰李侯璽下車之初環視城池喟然嘆曰設險以衛民莫重於城池承平無事城池有無奚關焉萬一有外侮城池不固百姓孰與守越數月政通人和乃聚百姓耆老議城事無不謹呼稱便者侯遂布令申諭示以法式約以程度分委督率各有執事於是城高池深壯觀逾舊遂於北城建樓樓制視南西樓而高廣數尺其東南西樓亦改作如北城焉三樓名各仍舊題北門樓曰望京是役也工肇於庚午二月落成於五月費而不擾勞而不怨非侯區畫之善而悅以使民能如是哉予獨慨今之司民牧者因率目前興革小利獵取名譽至於舉大事動大衆輒以勞費自諉不則或經畫疎略

費糜而寡效嗟乎任事難而成事亦不易也如侯者不辭勞不避怨不爲目前之計而爲經久之圖
不要節愛之名而垂利民之實自昔視官如家者非侯其人耶非侯其人耶

重修嚴子陵祠堂記

李養

嚴先生光本姓莊字子陵後漢書載爲餘姚人故富春山七里瀨皆在浙江嚴州而他籍往往不書
然新野志載爲邑人引嚴光碣及任延傳爲據則其事固可參訂矣子陵爲光武故人光武起白水
故子陵隱蹟南陽郡邑多有之余邑南十八里有小山曰富春迤東五里爲湍河河堦疊石十數曰
釣臺湍河則土人咸稱曰七里河云斯其說傳之上世世遠相沿孰能決其非是子陵旣生新野去
此百八十里亦安知其遺靈影影不時往來於此耶山頭有廟廢久矣余旣謝官野處欽其高風而
又幸爲鄉里之先生也乃重建小屋三楹於山之麓貌先生像於中而爲之說曰先生有言士固有
志當光武重興漢祚雲臺之將相環拱効力以共成不世之洪業彼子陵者亦安知不自量其素而
宋之諸儒論光武不處之繩愆弼違之任而欲相吏焉故子陵不就皆過也古之丘壑遺佚未嘗不
各有自就而後人喜爲擬議引世之凡情以爲有欲爲而不得爲可爲而不肯爲者豈所謂得其情

乎因爲歌以招之曰世日薄兮淫淫杳太古兮誰任望先生兮迴臨扇清風兮璫音薦蘋藻兮余心歌成刻之石爲子陵祠記

修築北渠記

前人

浙州縣北有渠蓋自設縣治有之起西北旺泉溝繞城一帶入小水河東南合粉青江蓋昔人以山水暴急恐觸城郭故障以此渠俾不爲害顧歲久而湮塞強梁有侵牟之者矣邑宰華陽劉公慨然起而疏濬焉命兩渠長董其役外爲堤內爲渠深廣各丈餘長可二三里許分地鳩工以鑿以築舊蹟明而新工倍井井成鉅防矣閩邑士民樂睹是舉有成長史魏君邑令馬君歲薦程君約以書來謂宜一言以眎諸後予嘗以壤地相接兩過浙川耳公之政也熟而近以丈量之役見其事妥而民便也則益服公之善爲令矣而獨茲渠耶夫世之談治道者未嘗不首云建利除害顧役興而衆擾事動而財耗且因以殘民生損國脈者多矣而曷利賴焉公素慈祥坦率民利與利而至有事用民又料理委悉不驚不猛真有古民牧之意則夫民樂趨事而工得底績閩邑享久長之利而頌公之德於不替者此非其一事哉而烏可無紀也春秋一工作一城築必書於策所以重民命而漢丹水

丞陳宣有水利碑炯炯載在故籍則夫劉公斯舉固於古爲烈矣哉故予樂爲書之工始萬曆九年迄工十年渠曰北渠公名承範別號華陽湖廣監利人其它政美當繼有述云時蓮幕倪君名文林別號國泉浙江仁和人督役赴工日省勤惰法亦得書

春風閣記

前人

鄧舊有春風閣蓋宋范文所建者予乃爲之記曰古之善爲政者於民物康定庶績咸熙之後類多爲臺爲亭爲樓閣者豈固以侈誇大之規廣遊囑之藉耶蓋深居簡出民隱土風所不能坐照而時有登覽則忻戚之餘感通係之於政教有補焉我張公以坦夷之心而播之以寬平之政不極不暴民用寧一旦補弊起圯凡公署學校城池之當興造者皆煥然改觀而又建斯閣於久湮之餘其取義不既深歟夫今天下之弊跳梁烽火之警無歲不然而三關九邊之民靡有安堵近者蘇松閩浙之地又爲海寇所蹂躪累世財蓄蕩然委盡則夫過其地觀其風景者不知何如其感慨也而吾輿以天地之中偏沐天子之沃澤闔閭相接雞犬相聞無流徙鮮震驚登斯閣而望之得不爲之暢然一喜乎然而地廣民貧饑饉盜賊虫蝗之殄歲嘗疊見故老私語而竊嘆已非復當時之舊他變

偶生民將何倚則夫登斯閣也又焉得不爲愴然興感耶一登覽而憂樂係之一憂樂之間而設施拯濟之方皆可隨時相地而廣圖使吾民涵育生遂常若萬物之鼓於春風發榮滋長不可沮遏以永有太平之樂此希文所以制名之意也希文先天下之憂而憂後天下之樂而樂其治鄧也有惠政民懷之不忘而後爲宋之名相雖至於今而斯閣之名猶炳炳未泯也我張公之德政固將踵其懿矩而率是行之其衷之所以自待者先憂後樂之志謂肯獨遜於希文也哉又焉知後之頌張公者不將曰此我之希文也如此則春風閣之名再起而相望於上下四五百年之間不謂天下之盛舉耶予特紀事標美以告夫後之治鄧者張公諱僊字誠之予同年也

岳鄂王廟記

前人

余嘗反覆宋事謂岳武穆之死不專在檜而世儒膠錮舊聞至顯不化則爲之啼歎掩面不自知其涕下也嗚呼宋之南渡棘矣高宗親以中興大事付武穆似可謂深知而專倚者卒而檜還自北睥睨談笑攫相位執國柄取大將於人主肘腋間而奄忽殺之其主竟不一問此可謂無其故乎且其初不聞檜有譖毀之說而武穆沒後不聞高宗有一追悼辨雪之意舉一代刑罰之重典含糊撝飾

竟不明見一語則謂高宗無意其間而歟檜操戈焉固難矣夫自二帝之北中國人心固繫之久而有君在臨安汙可小康而血睇中原唾手無日高宗漸思安之矣武穆則志欲恢復誓死不置即使二帝可還高宗將以夷齊自擬此在人情所不易言者而檜之小人固以有君戴之可勿外求武穆義在社稷事在高宗檜專高宗而亦託於安社稷者則武穆與其君意漸日以岐檜將乘隙而交鬪其間則武穆日疎檜日親武穆日遠檜日邇固不待金人以故約來責而武穆死無日矣武穆少年爲將威勛卓起峨峨加諸將上當時朝廷咸爲側目雖張浚韓世忠號爲一時賢者而亦不免有忌而檜本疏存宋室其反自金也張浚胡安國輩皆交口誦之爲賢可用高宗固暗懷之辟耳又曷能大置淑慝而當時物情向背亦焉有定卽武穆獄詞所謂至舒蘄不進欲棄山陽不守者亦焉知不謂稱上意也至其孫珂著書籲天用高宗手詔與出師日期相差比而後武穆之心迹始白嗚乎亦晚矣鄧州有武穆廟在小西關門內蓋史稱武穆復唐鄧則此地固宜祀者歲久幾壞先君捐貲首之而故州守陳文州貳任梓吏目張守亨僉事藍偉主事黃凝道教諭郭繼魯等繼成其事抵余因爲文諸碑也如此蓋辨夫史載之不自而申武穆之忠於無已也世之賢哲當有契於余言而毋曰

前人成案之有定也哉

永青山護國西齊王崔府君廟碑記

前人

余邑西南四十里有山曰永青上有大王廟余曾數陟其巔見其廟額曰西齊護國王問之士人莫知何神也因搨其廟碑碑半磨滅不可讀節其略曰鄧州西北九十里高山南頂立廟耆舊傳爲清山大王廟也並建泰山府君行殿始自唐元和年置靈壇雖有碑碣全無當今聖主功高百代德邁千王每頒天下名額增崇禴祀蒸嘗都維那首清河僕射張絢幸逢聖運喜過豐年昭成始終之規特發修建之志惟張絢先爲節將久踐台庭情懷履滿禮重仁和故顯名山異事貽風后軌時大宋天聖二禩歲次甲子正月十一日記碑不著作者名氏又不叙王爲何神後檢搜神記云唐貞觀七年祁州鼓城人崔子玉爲長子令遷潞陽縣令又遷衛州衛縣令晝治官曹夜理冥府諸靈怪事甚衆年六十四卒唐元宗封靈聖護國侯武宗加護國威應公宋眞宗東封岱嶽加封護國西齊王高宗南渡立廟杭州賜廟額曰顯衛而東嶽懺云岱嶽顯聖感應護國西齊王崔府君則知王爲東嶽神也崔府君封王在宋眞宗大中祥符元年戊申封泰山時今茲碑立在仁宗天聖二年非卽賜王

號之後十六年耶但碑云清山今名永青碑云併建太山府君行殿今無聞久矣而碑所謂清河僕射張綯乃當時修建廟宇者檢宋史諸書皆不見豈官爵雖尊而功烈無見於載籍耶嘉靖間土人重修此廟而撰記者見宋碑起首用秦皇漢武事爲比遂謬以王爲漢武帝時人殊足哂也崔府君廟南陽諸地皆有之因錄其行蹟大略鑱石置廟下俾茲土人崇奉者知所考焉

默嶠寺前塔子堰碑石記

前人

綱目前記云倚帝氏繼民氏治世山海經有倚帝之山今內鄉縣有倚立山是也顧此邑人絕無知者余懷此久矣而蔑一考見一日過邑東默嶠寺一名資聖寺寺前有三潭小廟中有金人所豎塔子堰碑言吾邑北塔子灣水名默河源出北山騎立新唐書隱逸傳南陽倚帝山今曰倚立余得此說喜甚以此段公案他籍罕載而騎立山卽今所謂五朶山則此鄉之人又豈知之者乎故余深幸有此碑恐久而缺沒也迺別鑄一石明書此事嵌之默嶠寺壁間以資博雅碑又言塔子灣堰卽召杜遺蹟杜名詩此碑名繼爲不可曉又默嶠寺今訛爲墨後地名灌掌今訛爲灌漲皆宜表出以俟夫後之考古者焉